

ШҮҮХ ЭМНЭЛГИЙН ШИНЖИЛГЭЭ ХИЙХ ЖУРАМ

Нэг. Нийтлэг үндэслэл

1.1. Эрүү, иргэн, захиргааны хэрэг маргааныг хянан шийдвэрлэх, зөрчил шалган шийдвэрлэх ажиллагааны явцад шинжлэх ухааны онол, арга зүйд тулгуурлан анагаах ухаан, биологийн холбогдолтой асуудлаар шүүх эмнэлгийн шинжилгээ (цаашид “шинжилгээ” гэх) хийх үйл ажиллагааг энэ журмаар зохицуулна.

1.2. Шүүх шинжилгээний байгууллагын шинжээч /цаашид “шинжээч” гэх/ нь шинжилгээ хийхдээ Шүүх шинжилгээний тухай хуулийн 5 дугаар зүйлд заасан зарчмыг баримтална.

1.3. Шинжилгээ хийхдээ Шүүх шинжилгээний тухай хууль, Эрүүгийн хэрэг хянан шийдвэрлэх тухай хууль, Иргэний хэрэг шүүхэд хянан шийдвэрлэх тухай хууль, Захиргааны хэрэг шүүхэд хянан шийдвэрлэх тухай хууль, Зөрчил шалган шийдвэрлэх тухай хууль, холбогдох бусад хууль тогтоомж болон энэ журмыг дагаж мөрдөнө.

Хоёр. Хүний биед шүүх эмнэлгийн шинжилгээ хийх

2.1. Хүний биед хийх шинжилгээнд Шүүх шинжилгээний тухай хуулийн 33 дугаар зүйлийн 33.1.2, 33.1.3, 33.1.4 дэх заалтад заасан шинжилгээ хамаарах бөгөөд энэ шинжилгээг хийхэд мөн хуулийн 33 дугаар зүйлийн 33.2, 41, 42 дугаар зүйлийг удирдлага болгоно.

2.2. Шүүхийн шинжилгээний тухай хуулийн 33 дугаар зүйлийн 33.1.2 дахь заалтад заасан шинжилгээг Эрүүл мэндийн сайд, Хууль зүй, дотоод хэргийн сайд, Улсын ерөнхий прокурорын хамтарсан тушаалаар батлагдсан “Хүний эрүүл мэндэд учирсан хохирлын зэрэг тогтоох журам”-ыг баримтлан хийнэ.

2.3. Шүүхийн шинжилгээний тухай хуулийн 33 дугаар зүйлийн 33.1.4 дэх заалтад заасан шинжилгээг прокурорын байгууллагын шийдвэрээр хийнэ.

2.4. Шүүхийн шинжилгээний тухай хуулийн 33 дугаар зүйлийн 33.1.3 дахь заалтад заасан шинжилгээг шинжилгээ хийлгэх эрх бүхий этгээдийн шийдвэрээр эрүү, иргэн, захиргааны хэрэг, маргааны шийдвэрлэхэд нас тогтоох шаардлагатай тохиолдолд хийнэ.

2.5. Хүний нас тогтоолгоход дараах баримт бичгийг бүрдүүлнэ:

2.5.1. шинжилгээ хийлгэх эрх бүхий этгээдийн тогтоол, захирамж байх;

2.5.2. боломжтой бол нас тогтоож буй хүний цахим үнэмлэх, төрсний гэрчилгээ, гадаад паспорт, жолооны үнэмлэх;

2.5.3. Үндэсний төв архивын газрын лавлагаа;

2.5.4. тухайн хүний намтарын талаар сайн мэдэх нас тогтоолгож буй этгээдээс насаар ах хоёроос доошгүй хүний тодорхойлолт, тайлбар;

2.5.5. насанд хүрээгүй хүүхэд, хөгжлийн бэрхшээлтэй иргэн, сэтгэцийн талаас өөрчлөлттэй этгээдэд шинжилгээ явуулахад түүний асран хамгаалагч, харгалзан дэмжигчийн баримт бичиг.

2.6.Хүний нас тогтоох шинжилгээг хийхдээ тухайн этгээдийн насны байдлаас хамаарч дараах үндсэн үзүүлэлтийг тусгах бөгөөд шинжилгээ нь удиртгал, үзлэг, шинжилгээ, дүгнэлтийн хэсгээс бүрдсэн магадлагаа гаргана:

2.6.1.биеийн ерөнхий өсөлт, хөгжилтийн хэмжилзүйн үзүүлэлтүүд /антропометрийн/ биеийн өндөр, жин, толгой, цээж, бүсэлхий, бугалга, шуу, бугуй, гуя, шилбэний тойргийн хэмжээ /лент метрээр/;

2.6.2.шүдлэлт, шүдний тоо, өнгө, хазалтын гадаргуугийн байдал, элэгдэл;

2.6.3.насанд хүрээгүй бол бэлгийн хоёрдогч шинж тэмдэг, суга, умдагны үсжилт, бэлгийн бойжилтын шинж, бэлгийн булчирхайн үйл ажиллагааны үзүүлэлт, сахал, биеийн үсжилт, бэлэг эрхтний байдал, насанд хүрээгүй эмэгтэй хүүхдийн аарцагийн хэмжээс, хөхний хэмжээ, биений юмны мөчлөг, ирэлт;

2.6.4.арьсны өнгө, үрчлээс, түүний байрлал, тоо, гүний байдал;

2.6.5.ясжилтын үзүүлэлт, рентген шинжилгээгээр ясжилтын цэг ба нягт, сийрэгжилт.

2.7.Эрүүгийн хуулийн тусгай ангийн Арван хоёрдугаар бүлэгт заасан гэмт хэргийн болон бэлгийн маргаантай асуудалд шүүх эмнэлгийн шинжилгээ хийхдээ Шүүх шинжилгээний тухай хуулийн 42 дугаар зүйлийн 42.1, 42.4, 42.6, 42.7, 47.2 дахь хэсгийг баримтална.

Гурав.Цогцост шүүх эмнэлгийн шинжилгээ хийх

3.1.Цогцост хийх шинжилгээнд Шүүх шинжилгээний тухай хуулийн 33 дугаар зүйлийн 33.1.1 дэх заалтад заасан шинжилгээ хамаарах бөгөөд мөн хуулийн 33 дугаар зүйлийн 33.4, 33.5, 33.6, 33.7, 33.8 дахь хэсэг болон Монгол Улсын стандарт MNS7015:2023-ыг баримтална.

3.2.Гадны нөлөөгөөр, эсхүл сэжигтэй байдлаар хүн нас барсан бол түүний үхлийн шалтгаан болон цогцос нь хэдэн настай хүн байсныг тогтооход цогцост хийх гадна үзлэгийг дараах байдлаар хийнэ:

3.2.1.цогцсыг зөөвөрлөх буюу хувцсыг нь тайлахын өмнө цогцсын ерөнхий байдал, сүв тус бүрээс гарсан зүйл, биед хутга, багаж болон бусад гадны биет хатгагдсан, зоогдсон эсэхийг сайтар шалгах;

3.2.2.цогцсын нас, хүйс, урт, жин, биеийн галбир, мах мариа, эрхтний бүрэн бүтэн байдлыг тодорхойлох;

3.2.3.цогцсыг дээрээс доош, урдаас арагш чиглэлээр нэг бүрчлэн үзэж, үсний өнгө, урт, хэлбэр, хоёр нүдний зовхи, хүүхэн хараа, хамрын хэлбэр, уруул, амны салстын өнгө, шүдний бүрэн бүтэн байдал, хоёр чихний дэлбэн, хүзүү, их бие, мөчдийн байдал, өөрчлөлт, түүнчлэн ам, хамар, чихний суваг, шээс, өтгөний сүв тус бүрээс ялгарсан зүйлийг шалгаж, өнгө шинж байдлыг нь тодорхойлон үзлэгийн тэмдэглэлд нарийвчлан тусгах;

3.2.4.цогцсын өөрчлөлт /хөрөлт, хөшилт, хүүрийн толбо, хаталт, ялзрал, хөлдөлт, түлэгдэлт, саванжилт, занданшилт, намагшилт/ үүссэн эсэхийг тодорхойлох.

3.3.Цогцост илэрсэн гэмтэл, өөрчлөлт тус бүрийг дараах байдлаар тэмдэглэлд тусгана:

3.3.1.гэмтлийн төрөл;

3.3.2.гэмтлийн байрлал /үүнийг гэмтэл биеийн аль хэсэгт байгааг босоо, хэвтээ тэнхлэгийн дагуу анатомийн нэршлээр нь тодорхойлно/-ыг тодорхойлох;

3.3.3.гэмтлийн өнгө /үүнийг арьс, салстын өнгөний хувирлаар, хэрэв үндсэн өнгө биш бол ямар туяа болохыг заах, эсхүл олон улсын өнгө тодорхойлогчийг ашиглан тодорхойлно/-ийг тогтоох;

3.3.4.гэмтлийн хэмжээ /үүнийг алслагдсан цэгүүдийн хооронд перпендикуляр огтлолоор хэмжиж /-г тодорхойлох;

3.3.5.гэмтлийн хэлбэр /үүнийг геометрийн дүрс, нийтлэг төстэй зүйлийн хэлбэрээр/-г тодорхойлох;

3.3.6.шархны төгсгөлүүдийн байрлалыг цагийн зүүний байрлалаар тодорхойлж бичих;

3.3.7.гэмтлийн гадаргуу /үүнийг барзгар, гөлгөр, овгор, хонхор, шүүдэс бохирдолт байгаа эсэхээр/-г тодорхойлох;

3.3.8.гэмтлийн зах ирмэг /үүнийг тэгш, тэгш бус, долгионтсон, шүдэлсэн, зах ирмэгт зулгаралт үүссэн, зулгаралт ямар хүчин зүйлийн улмаас үүссэн, арьс хууларсан зэрэг/-ийг тодорхойлох.

3.4.Цогцсын нас, хүйс, нас баралтын шалтгаантай холбоотой дараах зүйлийг тодорхойлж, тэмдэглэлд тусгана:

3.4.1.өвчин, эмгэгийн гадаад илрэл, хаван, тууралт, цэврүү, гүвдрүү, судас өргөссөн эсэх;

3.4.2.эмэгтэй хүний тухайд хөх, нөсөө, товчны хэлбэр, хэмжээ, гадна бэлэг эрхтэн, охин хальс, үтрээний амсар, хярзан, хошногоны амсрын байдал, өтгөний сүв, үтрээ, хөхнөөс ялгарсан зүйл;

3.4.3.ураг, нярайн цогцсынтухайд, жин, урт, биеийн галбир, салиа, зунгаг, толгойн хэмжээс, үс, шар үс, гуравдагч зовхи, чих, хамрын мөгөөрсний хэлбэржилт, хавирганы завсар, цээжний хэлбэр, хумсны ургалт, бэлгийн их, бага уруулын байдал, төмсөг хуухнагт буусан эсэх, хүйн байрлал, үрэвслийн цагариг, хүйн таслагдсан үзүүрийн байдал, /усанд дүрж үзэх/ , ихэсийн хэмжээ, жин, хэлтэнгийн тоо, цус хуралт, шохойжилт;

3.4.4.хэн болох нь тодорхойгүй цогцсынтухайд урт, жин, биеийн галбир, мах мариа, нүүрний хэлбэр, төрх, сахал, үсний байдал, мэнгэ, ургацаг, сорви, шивээс, хиймэл эрхтэн, өвчин, эмгэгийн илрэл, өмнө хийгдсэн гоо сайхны болон бие эрхтний хагалгааны сорви, ул мөр зэрэг таньж болох онцлогыг.

3.4.5.мэс заслын шархны байрлал, хэмжээ, өнгөр, шархны ирмэг, мэс заслын утас, оёдлын тоо.

3.5.Цогцос дотор эрхтнийг шинжлэхдээ гавал, цээж, хэвлийн хөндийн эрхтнийг заавал нэг бүрчлэн шинжлэх ба тухайн шинжилгээний онцлогоос хамаарч аль ч хөндийгөөс эхлэн хийж болно.

3.6.Цогцсын цээж, хэвлийн хөндийн агууламж, гялтангийн байдал, гадны биет, эрхтнүүдийн байрлалыг тэмдэглэж, дотор эрхтнүүдийг иж бүрдлээр нь гаргаж араас нь урагш, дээрээс нь доош чиглэлээр эрхтэн бүрийг хамруулан үзлэг хийж эрхтэн тус бүрийн дор дурдсан шинж чанарыг тусгасан тэмдэглэл хөтөлнө:

3.6.1.өнгө (үндсэн, суурь өнгө, туяарлаар ялгах);

3.6.2.хэлбэр;

3.6.3.тогтоц (хатуу, биелэг, зөөлөн, шавархаг, улбагар, хагас шингэн, хийрхэг г.м);

3.6.4.гадаргуу (толигор, барзгар, зангилаажсан, мөхлөгжсөн, жигд бус);

3.6.5.ирмэг (нимгэн, зузаан, мохоо, хурц);

3.6.6.хэмжээ (урт, өргө, зузааныг олон улсын Си системийн нэгжээр);

3.6.7.жин (олон улсын Си системийн нэгжээр);

3.6.8.цуллаг эрхтний цусан хангамж;

3.6.9.хөндийт эрхтний салст бүрхүүл болон дотор ханын байдал;

3.6.10.агууламж, гадны биет;

3.6.11.бүтэц (үе давхарга, дэлбэн, дэлбэнцэр, хэлтэн, хэлтэнцэр);

3.6.12.эмгэг өөрчлөлт;

3.6.13.гэмтэл түүний байрлал, шинж байдал;

3.6.14.яс, үе холбоос, мөчийн шинж байдал, хугарал, гэмтэл.

3.7.Цогцсын хөндийг нээмэгц дотор эрхтэний байрлал болон тухайн хөндийд шингэн, эсхүл гадны биет байгаа эсэхийг сайтар тогтооно. Шаардлагатай үед хийн, агаарын, өөхөн бөглөөдөс илрүүлэх сорил хийнэ. Дайвар хөндийг нээх болон мөчдийг шалгах шаардлага гарвал цогцсыг аль болох ар талаас нь нээж үзнэ.

3.8.Шинжээч дотор эрхтнийг нэг бүрчлэн үзэж шинжлэн, дараах байдлаар нэг бүрчлэн тэмдэглэлд тусгана:

3.8.1.гол судасны агууламж, өргөн, уян чанар, хатуурлын товрууны илрэл, гэмтэл, өөрчлөлт;

3.8.2.бөөрний дээд булчирхайн хэмжээ, давхаргын зааг, гэмтэл, өөрчлөлт;

3.8.3.бөөрний өөхөн эд болон бөөрний хэмжээ, өнгө, гадаргуу, тогтоц, цусан хангамж, тэвшинцэр, шээлүүр, давсагны байдал, шээсний өнгө, хэмжээ, гэмтэл, өөрчлөлт;

3.8.4.улаан хоолойн агууламж, салстын өнгө, судасны өргөсөл, гэмтэл, өөрчлөлт;

3.8.5.хэл, залгиур, төвөнхийн мөгөөрс, ховч ясны гэмтэл, өөрчлөлт;

3.8.6.цагаан мөгөөрсөн ба гуурсан хоолойн агууламж, салстын өнгө, цагираг мөгөөрсний байдал, гэмтэл, өөрчлөлт;

3.8.7.цээж, хэвлийн хөндийн цуллаг эрхтнийг дээрээс доош чиглэлээр үзэж шинжлэх ба эрхтэн тус бүрийн өнгө, хэлбэр, тогтоц /хатуу, биелэг, зөөлөн, улбагар/, гадаргуу /толигор, гялгар, барзгар, овон товон, жигд бус/, ирмэг /хурц, мохоо/, хэмжээ /урт, өргөн, зузаан см-ээр/, жин /гр-аар/, цусан хангамж, бүтэц, эмгэг өөрчлөлт, гэмтлийн шинж, байрлал;

3.8.8.зүрх, үнхэлцэг гадаргуу, эдгээрийн хөндий дэх агууламж, ховдлын ханын зузаан, цусан хангамж, хавхлаасын дэлгэсэн урт, хавхлагын ба хөхлөг булчингийн байдал, титэм судасны хатуурал, сүвний нарийсал, гэмтэл, өөрчлөлт;

3.8.9.ходоод, 12 нугалаа гэдэс, цөсний хүүдий, нарийн ба бүдүүн гэдэсний агууламж, салстын өнгө, атираа нугалаасын байдал, гэмтэл, өөрчлөлт;

3.8.10.голт, уушгины уг, чацархайн тунгалгийн булчирхай, судасны салаалалт;

3.8.11.багана нуруу, нугалам, хавирга, эгэм, өвчүү, аарцаг, дээд, доод мөчдийн ясны гэмтэл, өөрчлөлт;

3.8.12.толгой хуйхны дотор тал, гавлын орой, суурь яс, тархины хатуу ба зөөлөн бүрхүүл, тархины бөмбөлөг, түүний судасжилт, тархины эдийн гэмтэл, өөрчлөлт, ховдлын агууламж, шаардлагатай тохиолдолд гавлын дайвар хөндийн агууламж.

3.9.Цогцсын шинжилгээний дараа эрхтнийг цээж, хэвлийн хөндийд буцаан хийж, битүүлэн оёж цэгцэлж бүрэн бүтэн байдлыг хангах, хөндийнүүдээс шингэн гарахаас сэргийлж цогцсын хөндийнүүдэд чихээс хийж болно. Цогцсыг битүүмжлэн оёсны дараа угааж арчин хуурайшуулж, цогцос хадгалах газарт, эсхүл ар гэрт нь хүлээлгэн өгнө.

3.10.Шинжээч нь шинжилгээний дээжийг лабораториас гаргасан зааврын дагуу авч, холбогдох лабораторид илгээх бичгийн хамт хүргүүлэх ба уг бичигт хэний, аль эрхтэнээс хэзээ, хэдий хэмжээгээр дээж авсан, түүнд ямар төрлийн шинжилгээ хийхийг тэмдэглэж, үхлийн шалтгааныг товч бичнэ.

3.11.Цогцост илэрсэн гэмтэл, өөрчлөлт, лабораторийн шинжилгээний хариу, эмнэлгийн бичиг баримт, бусад материалыг нэгтгэн үнэлж үзсэний үндсэн дээр шинжээч эмч шүүх эмнэлгийн шинжилгээний онош тавина.

3.12.Цогцсын нас барсан шалтгааныг тогтоож, онош тавихдаа шинжээч эмч “Өвчин гэмтэл ба үхлийн шалтгааны олон улсын ангилал”-ыг баримтална.

3.13.Цогцост шаардлагагүй зүслэг хийх, эд, эрхтнийг таслах, авахыг хориглоно.

3.14.Цогцсыг дүрслэл оношлогооны аргаар шинжилж болох бөгөөд цогцост хийх дүрслэл оношлогооны шинжилгээг дангаар болон цогцсын шинжилгээтэй хавсарч хийж болно.

3.15.Цогцост дүрслэл оношлогооны аргаар шинжилгээ хийсэн бол дүгнэлтийг цогцост шинжилгээ хийсэн дүгнэлтийн адил үнэлнэ.

3.16.Цогцост дүрслэл оношлогооны аргаар шинжилгээг хийхдээ “Рентген оношлогооны төхөөрөмжийн ажиллагаанд чанарын хяналтын хэмжилт хийх арга” Монгол Улсын стандарт MNS 5391:2010-г баримтална.

Дөрөв. Хэргийн материалд шүүх эмнэгийн шинжилгээ хийх

4.1.Шүүх шинжилгээний тухай хуулийн 33 дугаар зүйлийн 33.3 дахь хэсэгт заасны дагуу хэргийн материалд шинжилгээ хийнэ.

4.2.Шинжилгээ хийх явцад шаардлагатай гэж үзвэл шинжээч томилсон шинжилгээ хийлгэх эрх бүхий этгээдэд мэдэгдэж мэргэжилтэн, шинжээчийг нэмэлтээр томилуулна.

4.3.Шинжээч болон хамтарсан шинжээчийн баг хэргийн материалд дахин шинжилгээ явуулж болно.

4.4.Хэргийн материалыг шинжээчийн бүрэлдэхүүн хүлээж авсан өдрөөс эхлэн хугацааг тооцно.

4.5.Хэргийн материал нь дүгнэлт гаргахад шаардлага хангахгүй, эмнэлгийн баримт материал дутуу бол ирүүлсэн холбогдох шинжилгээ хийлгэх эрх бүхий этгээдэд буцаах, эсхүл шаардлагатай баримт материалыг нэмэлтээр авч хугацааг сунгуулна.

4.6.Хэргийн материалд шинжээчийн дүгнэлт гаргахад зайлшгүй шаардлагатай тохиолдолд хүний биед үзлэг хийх, нэмэлт лабораторийн болон багажийн шинжилгээ хийх, шарил шинжлэх зэрэг ажиллагаа хийж болох ба энэ тухай шинжилгээ хийлгэх эрх бүхий этгээдэд мэдэгдэнэ.

4.7.Хэргийн материалд хийсэн шинжилгээний дүгнэлт дараах үндсэн гурван хэсгээс бүрдэнэ:

4.7.1.удиртгал хэсэгт шинжилгээ явуулж эхэлсэн, дууссан он сар, өдөр, дүгнэлт гаргуулахаар ирүүлсэн шинжилгээ хийлгэх эрх бүхий этгээдийн хаяг, албан тушаал, овог, нэр, томилсон он сар, өдөр, дүгнэлт гаргаж байгаа шинжээчийн албан тушаал, мэргэжлээрээ ажилласан хугацаа, зэрэг, цол, овог, нэр, тодорхой тохиолдолд шинжилгээний объектын гэрийн хаяг, эрхэлдэг ажил, нас, хүйс, овог, нэр, тухайн хэргийн болсон үйл явцын товч мэдээлэл, шинжилгээ хийлгэх эрх бүхий этгээдээс тавигдсан асуултууд;

4.7.2.шинжилгээний үндэслэл хэсэгт хэргийн материалаас дүгнэлт гаргахад үндэслэл болохуйц баримт материал /шинжээчийн дүгнэлт, эмнэлгийн бичиг баримт, бусад/-ыг ойлгомжтой дэс дараалалтай түүвэр, түүврийн хэргийн материалын хуудасны дугаар, он сар өдөр, шаардлагатай тохиолдолд хэргийн газрын үзлэг, гэрч, хохирогч холбогдогчийн мэдүүлэгийг;

4.7.3.дүгнэлтийн хэсэгт шинжээчийн шинжилгээ хийлгэх эрх бүхий этгээдийн тавигдсан асуултын хариулт, дүгнэлтийн шинжлэх ухааны үндэслэл, тайлбар.

4.8.Шинжилгээний байгууллагаас шинжилгээ хийх явцад тухайн хэрэг шийдвэрлэхэд ач холбогдол бүхий зүйлийг олж тогтоосон бол энэ талаар шинжээч томилох эрх бүхий этгээдээс тавигдсан асуултанд тусгагдаагүй ч дүгнэлтэндээ оруулж болно.

Тав.Шинжилгээг шинжээчдийн багаар хийх.

5.1. Дараах тохиолдолд шинжилгээг багаар хийнэ.

5.1.1.шинжилгээ нарийн төвөгтэй, шинжлэх ухааны цар хүрээ ихтэй;

5.1.2.эмч, эмнэлгийн ажилтны мэргэжлийн үйл ажиллагаатай холбоотой болон эхийн эндэгдлийн үед;

5.1.3.шарил шинжлэхэд;

5.1.4.Шүүхийн шинжилгээний тухай хуулийн 33 дугаар зүйлийн 33.1.4 дэх заалтад заасан шинжилгээ хийхэд.

5.2. Дахин шинжилгээг ижил мэргэжлийн шинжээчийн багаар хийлгэх тохиолдолд шүүх шинжилгээний байгууллагад ажиллаж буй нэг, түүнээс дээш шинжээчийг багийн бүрэлдэхүүнд оруулах ба өөр байгууллага болон бусад этгээдээр энэ хэлбэрийн шинжилгээг дангаар хийлгэхийг хориглоно.

5.3. Шинжилгээ хийж байгаа шинжээчид адил тэгш эрхтэйгаар оролцох бөгөөд санал зөрсөн тохиолдолд дүгнэлтийг тусдаа гаргаж болох бөгөөд уг дүгнэлтийг нэгдсэн дүгнэлт хавсаргана.

Зургаа.Бусад

6.1. Шинжилгээний объектод онош тодруулах зорилгоор илгээх бичгийн дагуу эмнэлзүйн лаборатори, хор судлал, биологи, бичил амь судлал, шүүх эд судлал, дүрс оношилгоо, молекул генетик болон бусад шаардлагатай төрөлжсөн мэргэшлийн шинжилгээг хийж болно.

6.2. Шинжээчийн дүгнэлтэд мэргэжлийн болон орчуулах боломжгүй гадаад нэр томъёог олон улсын нэршлээр хэрэглэж болно. Энэ тохиолдолд утгыг заавал эх хэлээр ойлгомжтой тайлбарлана.

6.3. Нэмэлт болон дахин шинжилгээ хийхдээ өмнө гаргасан дүгнэлтийн шинжилгээний объект ба шинжилсэн явцыг дурдаж, нэмж хийсэн ажиллагааны үр дүнг тусгана.

6.4. Шинжилгээнд тусгай болон төрөлжсөн мэргэшлийн шинжээч, нэмэлт гишүүнээр ажилласан тохиолдолд хөлсийг шинжээч томилсон байгууллага холбогдох журмыг үндэслэн олгоно.

6.5. Шүүх хуралдаанд шинжээчээр оролцсоны хөлсийг Эрүүгийн хянан шийдвэрлэх тухай хууль болон бусад хуульд заасны дагуу олгоно.

6.6. Энэхүү журмыг зөрчсөн албан тушаалтанд хууль тогтоомжид заасан хариуцлага хүлээлгэнэ.